

2 Corinthians

Harua Leta

Paul Mo Ulia Isana Mara

Corinth

Leta Nike

Paul mo řarami na retiusia nona kalesia Corinth, vara Paul i pa pala sohen mo vereia isara moiso teni mo vono. Mo sopo opoia vara i rohira matan mo levosahia vara i pa arira mata nora hehe (1.23). Paul mo opoia vara i sile na masapa isara vara i eři hitea vara la pa hahau usuri na mauri rasua sohena sava (2.5–11).

Paul mo vereia isara mara posin God mo řuhu isan la haratu la vejveju, ale mo lo kilau vara la pa tueni na kalesia la tilavono Jerusalem peresi Judea (8.1–9.15).

Paul mo vereia mara enia volitusi mata retitauhi paro non God (3.1–17). Mo lo turu řilangi mata lavi na tamlohi la mai isan God, hina purongo vara mo lo lavi na rani řilangi matana. (4.1–6.13; 10.1–12.10).

‘La hinau tari nika la tai isan God sei mo sara tamata peresi na tamlohi na varama hin Křisto, ale enia natu mo sile kamam na vavahinau mata tau na tamata.

Matan řa eři vereia vara hin Křisto, God mo sari tamata non varama vara i mele tapala peresia. Mo sopo mele evi na hehe nona tamlohi, ale mo sile kamam na retisohai mata sari tamata.’ (5.18–19)

Hin Leta Nike

1. Paul mo vere meje isan God (1.1–11)
2. Vavahinau nona vahařule non God (1.12–2.17)
3. Opoia non Křisto mo haloa (3.1–7.16)
4. Otori nona tilavono (8.1–9.15)
5. Vahařule varařuhu (10.1–13.10)
6. Isoiso Retioloolo (13.11–13)

Retioloolo Non Paul

¹ Enau Paul na uli leta nike peresi voraiŕa Timothy, enau vahaŕule non Kŕisto Iesu matea usuri na masalon God. Kama lo uliuli mo vano isana vao kalesia non God Corinth peresi na tapuhi sei la lo toho řalihi na jara tavera matan Achaia. ² Řomŕuhu peresi na tamata la mai isamim la tai isan God Tamaŕa peresi Moli Iesu Kŕisto.

God Mo Tahe Na Řomi Nona Tamlohi

³ Hasohaso tavera i vano isan God sei Taman noŕa Moli Iesu Kŕisto, enia God mo lo řomopoi na tamlohi, ale God mata tahe la haratu řomira la jovi. ⁴ Enia mo lo tahe na řomimam na nomam rani řilangi tari matan vara kama eŕi tahe na řomin tinapua na nora rani řilangi hin nanauhi sei God mo silea isamam. ⁵ Ale sohena kamam kama lo lavi na rani řilangi matuvana matan Kŕisto, ale hin Kŕisto sohena nomam nanauhi mo maŕivi savulevule. ⁶ Pani vara kama lo lavi na mauri řilangi, ka levosahia vara kama lavira mata i tahe na řomimim ale mata maurimim la juri; ale vara God mo tahe na řomimam, enia matan vara kama eŕi tahe na řomimim na nomim rani řilangi. Ale matana, ha eŕi řom peravu ha turu řilangi na rani řilangi sei sohen kama lo lavira. ⁷ Kama levosahi mamahunia vara ka lavi na rani řilangi peresi kamam, God i pa tahe na řomimim sohen mo lo vaia isamam.

⁸ Matan, la vorai peresi na vevorai, kama opoia vara ha levosahi mamahuni na rani řilangi sei kama lavira na jara tavera matan Asia. La lo puhoni kamam la jeu na suihamam tari, ale kama řom vara kama pa mate. ⁹ Varaŕuhu, kama řom vara talai mata mateia mo jovi isamam moiso hin la rani řilangi atu, ale matana, kama sopo mele rasu na suihamam pani kama tau na nomam rasua hin God sei mo sauteterahi la haratu la mate. ¹⁰ God mo sau naŕihi kamam na liman mateia, ale i pa juri kamam, ale kama tau na nomam řomtoho isana vara i pa

mele juri kamam. ¹¹ Kamim sohena, ha pa tueni kamam na nomim usiusi matamam, ale vuana, tamlohi matuvana la pa vere meje isan God matamam matan enia mo juri kamam na usiusi nona tamlohi matuvana.

Paul Mo Posi Na Ŗomina

¹² Kama lo retihapahapa sohena matan kama eŕi vere tataholoia vara Ŗomimam la sopo pisuhi kamam hin te nomam vavahinau mo sati kama lo vaira na naho tamlohi tari teni isamim. Kamam kama lo turu na Ŗomŕuhu non God, mo sopo na lelevosahi nona tamlohi, kama Ŗomatano kama lo hahau sohena natirihi na naho tamlohi, ale kama lo vaia nike isamim mo jeu na jara tinatinapua. ¹³ Matan kama lo uli na sava mo lo toho na Ŗomimam hin leta nike matan vara ha eŕi levosahi mamahunia, ale na lo Ŗomtau vara ha pa levosahi mamahuni kamam, ¹⁴ hina purongo vara nake ka sopo lo levosahi mamahuni kamam. Hin rani atu vara noŕa Moli Iesu i mele pala, kamim ha pa hapahapa matamam sohen nake kamam kama lo hapahapa matamim.

¹⁵ Ale matan na levosahi hinau atu, na lo vereea isamim tiroma vara a pa rohi kamim mata a sile na leŕuhu vaha rua isamim vara a toho peresi kamim. ¹⁶ Hin rani atu na Ŗomi vara a pa toho peresi kamim na maleleku na lo vano Macedonia, ale vara a lo mele mule ha pa tueniau na maleleku vara a sivo Judea.

¹⁷ Korong ka Ŗomŕomia vara na posi na Ŗomiku vara a pa rohi kamim matan na sopo mele pala isamim sohen na vereea moiso. Korong kara na lo halu sohena tamlohi varama sei lara “io” pani ŕarami nora retireti tataholo enia “mo vono”. ¹⁸ Sohen God mo lo varaŕuhu tarea, nomam retisohai isamim mo sopo “io” ale hitahu “mo vono”. ¹⁹ Matan Natun God, Iesu Kŕisto, haratu sei enau, Silas peresi Timothy, kama lo retivujavujangia isamim enia mo sopo “io” ale hitahu “mo vono”, pani hin Iesu enia

“io” tarea. ²⁰ Matan retitauhi tari non God hin Iesu enira mo isoiso “io”, ale matan haratu natu řa lo vere “amen” na rani řa lo hasohaso God hin Křisto. ²¹ Pani God natu mo vai kamam kama řilangi peresi kamim na rasua hin Křisto, ale enia natu mo viřoniřa mata nona vavahinau, ²² ale enia mo tapuhiřa, ale mo tau na Tanumena na mapuřa mo sohena vara mo tau na sope voliřa tiroma na hinau tari la pa mai hitahu.

²³ Ale na nahon God, na sopo halu, na sopo mele mai isamim Corinth matan na sopo opoia vara a vere komokomo kamim. ²⁴ Na sopo opoia vara kama aulu na nomim rasua, pani vara kama tapala peresi kamim na vavahinau matan vara nomim avulahi i pa mařivi na nomim turu řilangi na nomim rasua.

2

¹ Ale mo vaia na tau na řomiku vara a pa sopo rohi kamim ale ha mele rongo i sati matana. ² Matan, vara a vai kamim ha rongo i sati, hare natu i pa vaiau a avulahi pani la haratu sei na lo vaira la rongo mo sati? ³ Ale na uli hinau akerihi isamim matan vara a mai, a pa sopo rongo i sati hin la haratu sei mo tataholo vara la vai na noku avulahi i tavera jea. Ka sopo levosahia vara noku avulahi mo lo turu na nomim avulahi? ⁴ Na rongo mo sati hajavua hin rani atu na uli leta atu isamim, řomiku mo jovi tavera ale na tangi matana. Na sopo opoia vara a vai kamim ha řom sasati, pani na opoia vara ha levosahia sohena sava na lo opoi kamim.

God Mo Řomi Na Tamlohi Hehe

⁵ Vara tamlohi atu mo vaiau na rongo mo sati, mo sopo vaiau haseku vara a rongo i sati, pani na malele tinapua mo vai kamim mo isoiso ka rongo mo sati. ⁶ Enia mo lavi na rani řilangi tavera mata talai atu sei ka lo silea isana moiso hin rani atu kamim mo isoiso ka pulutahi jara

2 Corinthians 2:752 Corinthians 2:17

matea mata aria. ⁷ Ale nake mo tatahoro vara ha ŀomia, ale ha mele tahe na ŀomina, vara i vono, ŀomina i pa sati jea ale i jovi naŀihi na nona rasua vevuhi. ⁸ Ale nakerihi, i pa ŀuhu jea vara ha vujangia vara ka pa lo opoia.

⁹ Hin rani atu na lo uliuli sohena isamim matan vara a pa hitea vara ha pa oloolo hiniau i tikeli epu. ¹⁰ Vara ha ŀomi tamlohi akerihi hin te hiniau, enau sohena a pa ŀomia vara te hiniau mata ŀomia mo lo toho mo tikeli nake, ale na vaia na suihan Kŀisto matamim, ¹¹ matan vara Setan i pa sopo jeuŀa, matan enŀa ŀa levosahi mamahuni na malelen Setan.

Volitusi Mata Retitauhi Paro

¹² Hin rani atu nara na pala Troas vara a retivujavujangi na Retiŀuhu hin Kŀisto, hina purongo vara Moli mo sileau na masapa tavera matea, ¹³ ŀomiku mo sopo sakele matan na sopo lo hite voraiku Titus ea matan vara i vereau vara kamim ka lo toho sohena sava. Ale matana, na enŀa vuhoo isara Troas ale na malue na vano Macedonia.

Vavahinau Nona Vahaŀule

¹⁴ Pani ŀa vere meje tavera isan God sei hin Kŀisto, mo lo tiromaŀa ŀa lo jeu na noŀa meresahi tarea. Ale na sava jara ŀa lo vano hinira, enia mo vaiŀa ŀa lo vere na tinapua hin Moli, ale ŀa lo sohahi na Retiŀuhu sohena hasori ponaha ŀuhu matea. ¹⁵ Matan enŀa ŀa hasori ponaha ŀuhu non Kŀisto isan God isan la haratu sei God mo lo jurira, ale isan la haratu sei la pa tihai — ¹⁶ enŀa hasori ponaha ranga matea mata i sile na mate isara, pani isan vao atu la rasua enŀa hasori ponaha ŀuhu matea mata i sile na mauri. Ale hare natu mo tatahoro mata i vai la vavahinau nika? ¹⁷ Matan kamam kama sopo sohen la vao tamlohi vujangi tinapua sei la lo vere na reti non God na nora halu mata lavi na mania. Mo vono, kamam kama lo retivujavujangi na retisohahi non God mo sopo te halu hinia na nahon God,

ale peresi na suihan Křisto usuri na posposi tataholo nona vahařule non God.

3

¹ Ka řomi vara kama lo mele tapulo tahe kamam hasemam teni mo vono? Korong ka lo řomřomia vara kama pa lavi te leta isamim teni i mai isamim vara i vereva vara kamam sava tamlohi, sohena tamlohi tinapua la lo lavira matan tamlohi la sopo levosahira? ² Kamim ka nomam leta sei God mo ulia na mapumam, tamlohi tari la levosahia ale la eři evia, ³ mo vujangia vara kamim ka leta matea non Křisto sei kamam kama lo lavia mo mai isana, tea mo sopo ulia na pepa na limara pani Tanumen God sei mo mauri mo ulia, mo sopo sohena leu mo ulia na tavalu vatu, pani na mapu tamlohi.

⁴ Kama levosahi mamahuni la hinau nike nomam rasua hin God hin Křisto mo tavera. ⁵ Enia mo sopo vara kama řomřomia vara kama eři vai te hinau kamam hasemam, pani nomam eři eři mo tai isan God, ⁶ sei mo vaiřa řa tataholo mata eři vai na vavahinau non retitauhi paro mata mauri sei mo sopo usuri na leu la ulia na pepa, pani na Tanumena, matan leu mo sile na mateia, pani Tanumena mo sile na mauri.

Řuhuřuhu Retitauhi Paro

⁷ Pani, vara vavahinau atu tuai mata leu la ulia na tavalu vatu mo sile na mateia, hina purongo mo pala peresi na mera tavera ale mo vaia tavgavin Israel atu la sopo eři kilau tataholo na nahon Moses mata meran God mo mera na nahona pani mera atu mo lo majara, ⁸ řa levosahi mamahunia vara mera vavahinau non Tanumena i pa mele řuhu jea! ⁹ Matan, vara mera řuhuřuhu mo lo toho hin retitauhi tuai atu mata leu sei mo sile na talai, řa levosahia vara retitauhi paro sei mo lo vai na tamlohi la tataholo na nahon God mo mele řuhu jea. ¹⁰ Varařuhu,

sava retitauhi tuai mata leu mo vereā vara mo mera mo ŋuhu tiroma, nake mo sopo mele mera i ŋuhu matan retitauhi paro mo pete lavi na jarana moiso, ale mo mera mo ŋuhuŋuhu jea. ¹¹ Matan, vara sava mo lo majara tiroma mo mai peresi na mera ŋuhuŋuhu, meran retitauhi paro i pa toho jejeu i pa mele ŋuhuŋuhu jea.

¹² Ale matan retitauhi paro nike mo vai na ŋomiŋa mo ŋilangi, mo sopo te matahu na nomam vavahinau, ¹³ ale mo sopo sohen Moses sei tuai mo lo ropoi na nahona na tavalu ruru matea matan vara tavgavin Israel la sopo eŋi varoi mera atu mo lo majara na nahona. *Exo 34.30-35*

¹⁴ Pani ŋomira mo pelati, ale mo kakau nake, tavalu ruru atu mo pa lo toho vara la rongo tea mo evi retitauhi tuai atu. Tea i sopo eŋi lavi naŋihia hasena matan hin Kŋisto hasena tavalu ruru atu i eŋi malue. ¹⁵ Pani ŋomira mo pa lo pelati mo kakau nake vara la tapurongo na sava Moses mo ulia tuai, tavalu ruru atu mo pa lo ropoi na ŋomira.

¹⁶ Pani vara tea mo posi mo mai isan Moli, Moli mo lanaŋihi tavalu ruru atu. ¹⁷ Ale Moli enia Tanumen God, ale na sava jara Tanumen Moli mo lo toho hinia, tamlohi la pa materi. ¹⁸ Ale enŋa mo isoiso nahoŋa mo lo toho na jara tavera, ale la mera na meran Moli, ale mo lo posiŋa ŋa mai sohenā na merana makomakomona na suihan Moli sei enia Tanumen God.

4

Hina ŋuhuŋuhu Na Loloŋa

¹ Matan haratu, matan kama lavi vavahinau nike usuri na ŋomopoia non God, ŋomimam la sopo eŋi jovi. ² Pani kama ŋohu na hina luhu mata mahanuhanu, ale kama sopo vaihitea vara kama halu tea teni kama sopo posileji na reti non God. Pani kama lo retivujavujangi na retivaraŋuhu na jara tavera matan vara tamlohi la pa hitevosahia vara kama lo varaŋuhu na nahon God. ³ Pani

hina purongo vara God mo tavuhoro na noña Retiřuhu, mo tavuhoro purongo isan la haratu sei la pa tihai sei, ⁴ Setan, god matan varama nike, mo vusohi na řomin la haratu sei la sopo rasu, ale la pa sopo eři hitevosahi na meran Retiřuhu sei non Křisto — enia niniun God tataholo.

⁵ Kama sopo retivujavujangi hin kamam hasemam, pani hin Iesu Křisto sei enia Moli, ale kama vereva vara kamam nomim slev mata sava Iesu mo vaia matamam. ⁶ Matan God sei mo vereva mara, ‘Malarani i mera na řořoha.’ *Gen 1.3*
enia haratu sei mo lo mera na mapuřa matan vara i sileřa na mera mata lelevosahi řuhuřuhu non God řa hitea na maurin Iesu Křisto.

Hasohaso Tavera Mo Lo Mai

⁷ Pani kama lo lavi la hina řuhuřuhu nike na jilivi lepa purongo, matan vara suiha tavera sei tamlohi la eři hitea mo lo malue hin kamam mo sopo nomam pani non God hasena.

⁸ Kama lo lavi na rani řilangi na malele tari, pani la sopo lomolomo kamam. Kama sopo levosahia vara kama pa vai na sava, pani kama sopo hilu atu, ⁹ la tipahi kamam, pani God mo sopo rovo hin kamam, la vili sati kamam, pani kama mele turu. ¹⁰ Kama lo lavi na rani řilangi tarea na epemam hin mauri nike, ale la lo lavi na řungara mata mateia non Iesu matan vara tamlohi la pa eři hite na maurin Iesu na epemam.

¹¹ Varařuhu kama lo toho tarea na matarua mateia matan kama lo volitusi isan Iesu matan vara maurin Iesu i pa mera na jara tavera na epemam sei mata mate.

¹² Matana, kama lo nahoi na mateia, pani vuana enia nomim mauri tui tui.

¹³ Pani kama pa lo retivujavujangi matan nomam rasua mo tataholo na sava la ulia na psalm mara, ‘Na rasua, ale matana, na pa retireti.’

Psa 116.10

Ale kamam sohena, kama rasua, ale matana, kama pa retireti.

¹⁴ Kama pa vaia sohena matan kama levosahia vara God sei mo sauteterahi Iesu, i pa lavi kamam peresi kamim řa turu na nahona. ¹⁵ Hinau řilangi kama lo lavira na maurimam nake enira mata la tueni kamim. Ale sohen řomřuhu non God mo lo lavi na tamlohi matuvana la lo mai isan Křisto, tamlohi la pa mele hasohaso God i tavera jea.

¹⁶ Enia matan haratu natu mo vaia kama sopo hilu taleu. Hina purongo vara suiha epemam mo lo majara, pani maurimam la lo lua na rani hatehateahi. ¹⁷ Hina purongo vara řa hite na nořa rani řilangi matan nake sohena hina tavera, pani enira la varihi purongo matan enira mata makomo rani purongo. Řa levosahia vara nořa rani řilangi nake la pa sileřa na hasohaso tavera sei i pa toho jejeu hin mauri atu mo lo mai. ¹⁸ Ale řa sopo řomřomi na nořa rani řilangi matan nake, mo vono, pani řa lo kilau toho mata hinau řa sopo eři hitera. Matan sava sei řa eři hitera, enira la pa toho mata makomo rani purongo, pani sava řa sopo eři hitera la pa toho jejeu.

5

Epe Paro Matan Tui Tui

¹ Matan řa levosahia vara epeřa nike na varama řa lo toho hinia mo řovo — vara řa mate řa pa malue hinia — řa levosahia vara jarařa matea mo lo toho na tuka na epe matea matan tui tui sei tamlohi la sopo voroa na limara, pani God hasena mo vaia matařa. ² Řa lo malokoloko hin epeřa nike nake, ale řa lo kilau toho matan rani atu sei God i pa ru na epe matan tuka hiniřa sohena ruru paro. ³ Matan řa pa sopo toho sohena tanume mo sopo te epera, pani řa pa ru na epe paro matan tuka. ⁴ Epeřa nike nake la lo mate, la vaiřa řa rongohaji ale la puhoniřa, pani mo

sopo matan vara řa opoia vara řa mate ale řa sopo lavi te epe hatea. Řa opoia vara řa unu na epeřa paro matan vara mauri tui atu i řolomi epeřa tuai nike. ⁵ God hasena mo tatamahuniřa matan la hinau akerihi, ale mo sileřa na Tanumena sohena sope voliřa tiroma na hinau tari i pa silera hitahu.

⁶ Ale matana, tarea řa lo řomřilangi, hina purongo vara řa levosahia vara řa lo toho nike na varama na epeřa nakerihi, řa sopo lo toho peresi Moli, ⁷ matan nake, řa lo mauri na rasua, mo sopo na sava řa lo hitera. ⁸ Varařuhu řa řomřilangi, ale řa levosahia vara i pa mele řuhu vara řa eři malue hin la epe nike matan vara řa pa toho na jarařa na tuka peresi Moli. ⁹ Hina purongo vara řa lo mauri hin epe nike teni vara řa mate řa malue hinia, řa lo tau na řomiřa hinia mata i lo vai Moli i avulahi tarea. ¹⁰ Matana enřa tari řa pa turu na nahon Křisto na nona jara sakele mata aria vara i ariřa. Řa pa lavi na sava mo tataholo isana usuri na sava řa vaia mo řuhu teni mo sati hin epeřa nike na varama.

Vahařule Non Retitauhi Paro

¹¹ Matan kama levosahi matahu tavera akerihi mata aria non Křisto, enia mo vai kamam kama voko řilangi vara kama reve na tinapua isana. God mo levosahia vara kama lo varařuhu, ale na lo řomtoho vara kamim sohena ka levosahia. ¹² Kamam kama sopo mele vaihitea vara kama hase tahe kamam, mo vono. Kama lo vere kamim hin la hinau nike matan vara ha eři hapahapa hin kamam, ale matan vara ha eři řarami la tamlohi vujangi haluhalu atu sei la lo reti mangisi na nora vavahinau purongo, pani la sopo vere varařuhu vara enira la sava tamlohi. ¹³ Matan vara tea la hitea vara kama rongorongo vono, enia matan vara kama pa sile na hasohaso isan God hinira. Ale vara kama lo vai na hinau tataholo, enia matan vara i tueni kamim. ¹⁴ Matan opoia non Křisto mo lo halo

kamam, matan kama levosahi mamahunia vara Křisto mo mate mata tamlohi tari: ale matan hinia tamlohi tari la mate. ¹⁵ Ale enia mo mate mata tamlohi tari matan vara la haratu la lo mauri la pa sopo mauri nora hasera, pani la pa mauri non haratu sei mo mate matara, ale God mo sauteterahia na mateia.

¹⁶ Matan haratu nake, kama sopo mele kilau na tamlohi usuri na řom tamlohi. Tuai na lo řomřomia sohena hin Křisto vara enia tamlohi matea purongo. Pani nake noku kilakilau mo sopo mele sohena. ¹⁷ Mo řaramia vara la haratu la mai kalesia hin Křisto la mai tamlohi paro. La sopo mele sohen tuai, matan mauri tuai mo tihai, ale mauri paro mo tapulo moiso.

¹⁸ La hinau tari nike la tai isan God sei mo sari tamata peresi na tamlohi na varama hin Křisto, ale enia natu mo sile kamam na vavahinau mata tau na tamata. ¹⁹ Matan řa eři vereá vara hin Křisto, God mo sari tamata non varama vara i mele tapala peresia. Mo sopo mele evi na hehe nona tamlohi, ale mo sile kamam na retisohai mata sari tamata. ²⁰ Matan haratu, kamam kama vahařule non Křisto, ale hin kamam, God mo lo usi kamim řilangi sohen Křisto hasena mo lo usia vara ha sari tamata peresi God! ²¹ Matan God mo vai Křisto sei mo sopo hehe hin te rani, mo mai nořa malamalai mata hehe, matan vara hinia, řa pa eři mai řa tataholo na nahon God.

6

¹ Ale matan enřa řa tapala na vavahinau non Moli, kama lo usi kamim mo řilangi vara ha sopo řomřomi purongo na retisohai řuhuřuhu mata řomřuhu non God. ² Matan God mo vereá mara,
'Na ranina tataholo na rongoho,

Na rani mata juri na tueniho.'

Isa 49:8

Varařuhu, God mo lo tatamahu mata i tueni kamim nakerihi. Nakerihi enia rani mata juri.

Rani Ĥilangi Non Paul

³ Kama sopo sile na masapa vara tea i pa řohu hin Moli na sava kama lo vaia, matan vara tea i sopo eři hite te hina sati na nomam vavahinai. ⁴ Matan hinau tari kamam vahařule kama lo vaira, kama vaihitea vara tamlohi la hitea vara varařuhu kamam vahařule varařuhu non God. Kama lo řomperavu tarea na rongohaji peresi na rani řilangi peresi na rani sasati tinatinapua, ⁵ ale na rani tamlohi la tamaji kamam, teni vara la pulahi kamam na lolo ima řilangi, teni vara vao tamlohi la meresahi hin kamam, teni vara kama voko mate, ale kama kilau rani vaha visa, ale kama marohati. ⁶ Kama lo hahau na posposi vokevoke, kama lo vujangi na nomam lelevosahi hin Křisto, ale na nomam řomperavu, na nomam řomřuhu, na nomam opoia varařuhu, ale na suihan Tanume Tapu. ⁷ Kama lo turu řilangi na retivujavujangi mata retivarařuhu. Suihan God mo lo voko hin kamam. Nomam posposi tataholo mo sohena sita vuro matea mata i tajovjovi na hehe na matua limamam, ale tingting matea mata i turuhoro na meresahi na marau limamam. ⁸ Kama lo volitusi isan God, hina purongo vara tamlohi la sile na oloolo isamam teni vara la řohu hin kamam, hina purongo vara la vereřesřesi kamam teni la hasohaso kamam. Kama lo varařuhu, pani hai la verea lara kama tamlohi halu! ⁹ Tamlohi la levosahi mamahuni kamam, pani la vai kamam sohena la sopo levosahi kamam. Kama lo toho na matarua mateia, pani ka hitea kama pa lo mauri nahai! La hamaji komokomo kamam pani kama sopo mate, ¹⁰ ale řomimam la sati, pani kama avulahi, kama sohena tilavono, pani kama vai na mauri tamlohi matuvana la mele řuhu jea, ale sohena mo sopo te nomam hinahinai, pani hinau tari enira nomam.

¹¹ La tapala řuhuřuhu matan Corinth, kama lo retireti tataholo peresi kamim, kama avulahi tarea mata kama tueni kamim. ¹² Mo sopo te hinau i turuhoro na nomam

opoia isamim, pani matan kamim purongo ka horo na nomim opoia isamam. ¹³ Ale ka levosahia vara na lo retireti isamim na opoia sohena natuku tataholo, ale kamim sohena, ha avulahi vara řa mele tapala.

Temple Non God Mo Mauri

¹⁴ Ha sopo turu jara matea na vavahinai non la haratu la sopo usuri na mauri rasua, matan i pa sohena sava vara tea i vai na posposi tataholo i eři tapala peresi la haratu la lo tope na leu? Teni sohena sava natu malarani i eři tapala peresi na řořoha? ¹⁵ Křisto enia Tiapolo la eři turu jara matea hin te hinai teni mo vono? Ka levosahia vara la haratu la rasu God la lo lotua, pani la haratu la sopo rasua la lo lotulotu vono. ¹⁶ Ale sohena sava natu hinai mata lotulotu vono i eři turu jara matea na lolo Temple non God? Matan enřa řa temple non God sei mo lo mauri, mo sohen God mo retitauhi hinira moiso mara,

‘A pa toho hinira

ale a pa lo hahau na livuhara.

Enau a pa nora God,

ale enira la pa noku tamlohi.’

Lev 26.12; Ezek 37.27

¹⁷ ‘Matana, ha malue hinira

ale ha turu hasemim hinira,

Moli mo vereia.

Ha sopo tikeli na nora hina lumiha,

ale a pa avulahi hin kamim.’

Isa 52.11; Ezek 20.34

¹⁸ ‘A pa Tamamim,

ale kamim ha pa natuku,

peresi na venatuku,

Moli God Suiha mo vereia.’

2 Sam 7.14

7

¹ La tapala řuhuřuhu, matan řa lavi la retitauhi nike, řa tau nařihi na posposi tari sei la eři vai na epeřa peresi na mauriřa la lumiha, matan vara řa eři lavi mauri atu mo tapu matan řa lo lotu God na nořa matahu.

Paul Mo Avulahi

² Ha avulahi vara řa mele tapala! Kama sopo vai te hinau i sati isan tea, kama sopo tikauleji tea, kama sopo haluhalu tea. ³ Na sopo vere harihi matan vara i vai na řomimim i sati, matan na pete vereaa isamim moiso vara kamim ka lo toho na mapumam, ale vara řa mate jara matea, řa pa mauri jara matea. ⁴ Enau na rasu kamim, ale noku hapahapa matamim mo tavera jea. Ka tahe na řomiku, ale ka vaiau na avulahi hina purongo na nomam rani řilangi nake.

⁵ Na rani kama kakau Macedonia, kama sopo mapu matan řalihi hin kamam rani řilangi la lo mai na jara tari, ale na lolomam, matahu mo lo malue matana. ⁶ Pani God atu sei mo lo tahe na řomin la haratu řomira la jovi mo tahe na řomimam na rani Titus mo pala. ⁷ Kama sopo avulahi purongo na nona pala pani na retisohai řuhuřuhu sei ka silea isana. Noku avulahi mo tavera na nona pala matan mo vereau hinia sohena sava ka lo kilau toho matan rani atu vara a pa mele rohi kamim hinia, ale sohena sava řomimim mo sati, ale sohena sava řomimim mo sati matan hehe atu, ale vara nomim opoia hiniau mo sohena sava.

⁸ Řomiku mo sopo mele sati matan leta atu na sohaia, hina purongo vara řomiku mo sati mata makomo rani, matan na levosahia vara ka rongo mo sati matana mata makomo rani. ⁹ Nake na lo avulahi matan na sohaia, mo sopo matan mo vai kamim ka rongo mo sati, pani matan nomim řomi sati mo vai kamim ka posi na nomim hehe. Řomi sati atu natu God mo lo opoi na nona tamlohi vara la

lavia, ale na isoisona, kama sopo komo kamim hin te hinau matana. ¹⁰ Matan God i eři vai na řomi sati mata hehe na mauriřa i tueniřa, mata i vaiřa řa posi na nořa hehe, ale vuana enia řa pa juri. Ale mauriřa i sopo eři sati na řomi sati sohen harihi. Pani řomi sati sei mo sopo te posi matana mata hehe, enia pa haratu sei vuana enia mateia.

¹¹ Ka hite na sava řomi sati řuhuřuhu nike mo vaia na maurimim? Mo vujangia vara ka tatamahu varařuhu mata oloolo sohena sava, ale mata vai na hijamim la vokevoke, ale vara lolokoru matan hehe akerihi sei mo vai na matamim mo lo roi matana, ale sohena ka lo kilau toho mata ha mele hiteau, ale sohena ka řomjea vara ha sile na talai isan tamlohi atu mo lo hehe. [1Co 5.1-2](#)

Ka lo vujangia vara ka vaihitea vara ha vai na hinau tari ka eři vaira mata vai na hinau la tataholo. ¹² Ale matana, hina purongo vara na uliuli isamim, pani mo sopo matan haratu mo lo vai na hehe, teni isan haratu sei hehe atu mo vai na řomina mo sati, pani matan vara a vujangi kamim sohena sava ka lo tatamahu mata usuri na nomam reti na nahon God. ¹³ Ale kama avulahi tavera matana, mo sopo matan haratu purongo, pani matan kama avulahi tavera matan kama hite na avulahi non Titus mata nomim posposi řuhu sei ka lavia hinia, ale sohena sava ka vai na řomina mo sakele matan hinau akerihi. ¹⁴ Enau na vereea isana sohena sava na hapahapa hin kamim, ale kamim ka sopo vai na řomiku i jovi. Tarea na lo reti varařuhu isamim, ale nakerihi na levosahia vara noku reti hapahapa isan Titus matamim mo varařuhu. ¹⁵ Ale nake mo lo opoi kamim mo tavera jea vara mo lo řomřomi na nomim oloolo, ale sohena sava ka lavia na oloolo tavera. ¹⁶ Nake na avulahi tavera matan noku rasua mo řilangi hin kamim.

8

Řa Pa Hansohai Tarea

¹ Ale nakerihi na opoia vara a vereā isamim la vorai peresi na vevorai, na sava God na nona řomřuhu mo vaia na nona vao kalesia tari Macedonia. ² Hina purongo vara nora rani řilangi peresi na rani sasati mo matuvana, nora avulahi řuhuřuhu peresi na mauri tilavono mo vaira la avulahi jea mata tueni na tinapua na nora hansohai. ³ Matan a eři vereā vara la sopo sile purongoi na sava la eři silea pani mo jeu haratu, matan la silea na nora řomavulahi purongo. ⁴ La usia vaha visa moiso vara la eři sořotahi peresi na tinapua mata la sile te tuetueni mata i tueni na kalesia tilavono Jerusalem ale na jara tavera matan Judea. ⁵ Ale aulu hin haratu, la vai na hināu mo jeu na nomam řomtau, matan la hase silera isan Moli tiroma, moiso la tatamahu mata vai na sava kama vereā usuri na masalon God.

⁶ Ale kamim vao kalesia sei Corinth, ka levosahia vara kama mele usi Titus sei mo lo vereā isamim tiroma moiso vara i pa mele vano isamim, ale i usi kamim vara ha vai mařivisi na nomim silesilea. ⁷ Ale matan usuri na posimim ka lo vaia mo řuhuřuhu jea na hināu tari — nomim rasua mo tavera jea, nomim tamlohi hai la eři retireti mo řuhu, ka lelevosahi, řomimim mo řilangi mata ha vai na hināu, ale nomim opoia hin kamam mo tavera jea — pani nake na opoia vara ha mařivisi na nomim vavahināu mata sile na silesilea sohen ka lo vaia na hināu tinatinapua mo řuhu. ⁸ Na sopo vereā vara ha pa sile na silesilea nike sohena ratileu matea, pani na lo vaihite na nomim opoia. Matan na opoia vara a hitea vara i pa sohena opoia nona vao kalesia tinapua Macedonia teni mo vono.

⁹ Matan kamim ka levosahi na řomřuhu non nořa Moli Iesu Křisto, vara hina purongo vara enia mo tavgav sohen God mo tavgav, enia mo mai tamlohi tilavono matamim, matan vara na nona tilavono kamim ha pa tavgav na mauri.

¹⁰ Ale mo řuhu vara ha vai vevuhi na silesilea sei ka tapulona na tauni sei mo vano moiso, matan kamim natu ka vereea řomřomi sei, ale kamim natu ka tapulo mata ha vaia. ¹¹ Mo tataholo mata ha vai vevuhia sohen ka řomjea hinia na tapulona. Ha sile na sava ha eři silea. ¹² Vara ka avulahi jea mata ha sile na silesilea, mo sopo te hinau hinia vara ha eři sile i visa. God mo opoia vara ha sile na sava ha eři silea, mo sopo usi na hinau mo sopo te nomim. ¹³ Na sopo vereea vara ha pa silea hajavua matan vara i vai kamim ha vejuveju. Na lo vereea matan na sopo opoia vara tea i eři vereea vara kama lo tametame te tatua vao kalesia purongo. ¹⁴ Nake nomim tavgav mo mařivi, ale ha eři tuenira Judea na nora vejuveju. Ale hin te rani vara ka vejuveju, enira sohen la pa eři tueni kamim. Hin malele akerihi natu vao kalesia tari la pa sopo eři vejuveju hin te hinau hinia. ¹⁵ Mo sohen la ulia tuai na Retitapu vara, ‘Haratu mo takonahi na mana mo mařivi, nona mo sopo mařivi hajavua, ale haratu mo takonahi makomona, nona mo sopo makomona hajavua’.

Exo 16.18

Titus Tolu Na Tapalana

¹⁶ Pani na lo vere meje isan God sei mo tau na řomřomi matea hin Titus sohen mo taua hiniau mata kama kilau kamim. ¹⁷ Kama usia vara i mele rohi kamim, ale mo avulahi matana, aulu hin haratu, enia mo lo tatamahu moiso vara i mele vano i hite kamim. ¹⁸ Kama pa řule na vorai tinapua matea vara i usuri Titus. Vao kalesia tari la majinga vara vorai sei enia tamlohi řuhu matea mata retivujavujangi na Retiřuhu. ¹⁹ Aulu hin haratu vao kalesia nike Macedonia la viřoni vorai sei vara i pa usuri kamam na rani kama sivo Jerusalem mata sile silesilea nike isana kalesia tilavono ea — enia vavahinau matea i pa sile na hasohaso isan Moli, ale mo vujangia vara kama tatamahu mata tuetueni. ²⁰ Kama pa hahau jara matea

matan vara i pa sopo sile te masapa vara tea la řomřomia vara kama lo roro hin silesilea avulahi nike. ²¹ Ale matana, kama lo vaihitea tarea vara kama vai na hina tataholo na nahon God peresi na naho tamlohi.

²² Ale kama lo mele řule na vorai kalesia tinapua matea peresira Corinth, enia mo jeu na nomam hina vaihite moiso, ale mo mera purongo vara mo avulahi na hinau matuvana, pani nake mo mele jeu tiroma matan mo rasu kamim mo tavera jea. ²³ Vara te retiusia matan Titus, ha vereea isara vara enia tapalaku mata i vai na vavahinau non Moli matamim. Ale la vorai tinapua sei la lo usuria enira vahařule řuhu nona vao kalesia nike, ale nora tovongi mo vai na tamlohi la hasohaso Křisto matara. ²⁴ Ale matana, ha turu peresira matan vara vao kalesia la pa eři hitevosahi na nomim opoia, ale vara i vujangia vara nomam reti hapahapa matamim mo varařuhu.

9

Silesilea Nona Kalesia Jerusalem

¹ Na levosahia vara mo sopo te hinau hinia vara a sopo uliuli matan silesilea nike nona tapuhi Jerusalem, ² matan na levosahia vara ka lo tatamahu mata ha tuenira moiso. Ale na reti hapahapa moiso isan tapalařa nike Macedonia vara kamim kalesia Corinth ka tatamahu hin tauni sei mo vano moiso vara ha sohai na silesilea matea, ale nomim avulahi mo vai na vao kalesia tinapua řomira mo řilangi mata la tapulo na tuetueni. ³ Pani na lo řule la vorai kalesia nike vara la hitea vara varařuhu ka tatamahu sohen na vereea isara vara ha pa tatamahuni na mania moiso. Na sopo opoia vara la pa hitea vara noku reti hapahapa nike hin kamim i vano hina purongo. ⁴ Matan, vara te mara Macedonia i mai peresiau ale vara i hitea vara ka sopo tatamahu, kama pa mahanuhanu ale kamim sohena, matan kama vereea moiso vara kama lo

rasu kamim. ⁵ Matan na sopo opoia vara a mahanuhanu, na řomřomia vara a usi la vorai kalesia nike vara la mai isamim tiroma mata la tatamahuni na nomim silesilea tavera sei ka lo retitauhi hinia moiso. Ale mo sopo hinau matea mata ngurunguru matana, pani enia silesilea matea usuri na nomim řomavulahi.

Ha Hansohai Matan God Mo Hansohai Tiroma

⁶ Ha lo levosahia vara tamlohi isa matea vara mo lavo na piri mo visalete, i pa vua makomona purongo. Pani haratu mo lavo na piri matuvana, i pa lavi na vuana matuvana.

⁷ Kamim hatehateahi ha pa silesile usuri na řomimim hasemim, mo sopo matan ka sopo řomavulahi teni matan tea mo ngurunguru hin kamim, pani matan God mo opoi haratu sei mo sile na nona silesilea na avulahi. ⁸ Ale God i eři sile kamim na hinau tari ka opoira, matan vara ha sopo eři vejuveju hin te hinau ka opoia, ale matana, ha eři mele tueni na tinapua na sopena. ⁹ Mo sohena Retitapu mo vere vara,

‘Haratu la tataholo na nahon God,
la lo hansohai tarea isana tilavono.

Ale God i pa sopo řomalihō

na nora vavahināu řuhu sei hin te rani.’ *Psa 112.9*

¹⁰ Matan God enia haratu sei mo lo sile na piri wit isana tamlohi isa, moiso mo vai na pereti mata hanhāni hinia. Hin malele akerihi natu God i pa sile na masapa matuvana isamim mata ha vai na vavahināu řuhu, ale enia i pa vai na nomim hansohai i vua tavera isamim.

¹¹ Enjora, ha pa mařivi savulevule matan vara ha eři hansohai i jeu tiroma. Ale na rani vara kama lavi na nomim silesilea i vano isan la haratu la vejuveju, la pa ulō na vere meje isan God matana. ¹² Hināu mo rua vahatea la pa masese matan silesilea atu, i pa mařivisi na vejuveju nona tapuhi Jerusalem, ale la pa hasohaso God na nora vere meje matana. ¹³ Kamim ha pa tahe na hijan God na

nomim silesilea na avulahi. Matan nomim hansohai isara i pa vujangia vara kamim ka lo ooloo na Retiřuhu non Křisto, ale la kalesia atu la pa hasohaso God matamim.

¹⁴ Ale la pa ususi matamim na opoia tavera mata řomřuhu řuhuřuhu non God sei mo lo malue hin kamim.

¹⁵ Ha vere meje isan God matan Natuna — matan nona otori řuhuřuhu sei mo sopo te reti i eři vere a vara mo řuhu sohena sava.

10

Suiha Nona Vahařule Varařuhu Non God

¹ Enau Paul haseku, na lo usia řilangi isamim vara ha tapurongo isaku. Na lo vaia usuri na řommalum peresi na posposi malum non Křisto, enau sei tamlohi hai Corinth la lo vere a vara enau na malum vara na lo toho isamim pani vara na malue na lo řilangi isamim na noku leta!

² Na lo řomtau vara i pa sopo sohena, pani korong vara na mai a pa řilangi isan la haratu sei la řom vara kama lo vavahinau usuri na posposi tamlohi purongo. ³ Hina purongo kamam kama tamlohi varama, pani kama sopo vai na vuro usuri na řomřomi nona tamlohi, ⁴ matan nomam hinahinau mata vai na vuro mo sopo matan varama nike, pani God mo vai na retivarařuhu mo suiha mata vilijovjovi na řomřomi řilangi non Tiapolo sei la lo taurilati na tamlohi. Ale la suiha mata la vilijovjovi na řomřomi ⁵ peresi na řomaulu tari sei la lo turuhoro na tamlohi na lelevosahi hin God. Ale kama taurilati na řomřomi tari na retivarařuhu, ale kama vaira la ooloo hin Křisto. ⁶ Ale kama lo tatamahu mata kama sile na talai isana tamlohi lejileji tari sei atu, ale kama pa vaia hin rani atu vara kamim mo isoiso ka lo ooloo hin Křisto moiso.

⁷ Kamim ka lo kilau na huri tamlohi purongo. Kamim ka hitevosahia moiso vara kamam kama tamlohi non Křisto, sohen la haratu sei la lo reti hapahapa lara enira non Křisto. ⁸ Korong, ha pa hitea vara na lo pohapoha na suiha

sei Moli mo silea isamam. Pani suiha nike enia matan vara i turuhi kamim, mo sopo matan vara i vilijovjovi kamim. Ale a pa sopo tinañihia vara tea i vaiu a mahanuhanu, vara i vai na noku vavahinai isamim i mai hina purongo.

⁹ Na sopo opoia vara tea i řomřomia vara na lo řilangi na noku leta purongo ale i vai na tamlohi la matahuniau matana, ¹⁰ matan hai la lo vereea lara, “Paul enia hare? Nona leta la řilangi pani enia mo sopo te suihana, ale mo sopo tamlohi matea mata retireti i řuhu.” ¹¹ La haratu la lo retireti sohen harihi, la levosahia moiso vara kamam kama lo řilangi na nahomim sohen kama lo řilangi na nomam leta.

¹² Matan kamam kama sopo řomřomia vara kama pa vereea vara kama tamlohi řuhu i tikeli la tamlohi sei la lo vereea vara enira io. Pani ka hitea, enira la lo hase kilau usurira na tatuara purongo vara hare natu mo řuhu sohena sava. Hinau akerihi enia rongorongono vono purongo!

¹³ Pani kama pa sopo reti hapahapa hin te hinau sei mo sopo nomam. Mata kama tau na řomimam mata vai na vavahinai sei God mo taua na limamam purongo, ale mo taua vara kama pa vavahinai na jaramim mara Corinth.

¹⁴ Matan mo tataholo purongo vara kama lo vereea vara kama aulu hin kamim na mauri rasua, matan kamam natu, kama tiroma tamlohi sei mata lavi na Retiřuhu non Křisto isamim. ¹⁵ Ale kama sopo lavi na hasohaso mata vavahinai nona tinapua, mo vono, kama lo řomtau vara nomim rasua i pa ulua, ale vara nomam vavahinai isamam i pa ulua i mele tavera jea, ¹⁶ matan vara kama pa retivujavujangi na jara tinapua sei tele vano na jaramim. Ale kama pa sopo reti hapahapa hin te vavahinai tamlohi tinapua la vaira hin la jara tinapua atu. ¹⁷ Pani Retitapu mo vereea vara,

‘Vara tea mo opoia vara i reti hapahapa,

i pa reti hapa hapa na sava Moli mo vaia purongo.' *Jer*
9.24

¹⁸ Matan hina aulu mo sopo haratu sei mo hase vereā hasena, pani haratu Moli mo vereā vara mo vaia mo ŋuhu.

11

Vahaŋule Haluhalu

¹ Na o poia vara ha ŋomperavu mata makomo rani perea, ale a pa retireti sohena tamlohi rongorongo vono matea mo lo retireti, pani na levosahia vara varaŋuhu ka lo ŋomperavu isaku. ² Enau na mereimerei matamim na mereimerei non God. Matan na retitauhi vara kamim ha pa sohena haŋai lahi vokevoke matea tuana matelete, enia Kŋisto. ³ Pani na lo matahu vara sohen tuai mata sasati atu Tiapolo mo halu Eve na nona haluhalu, ale vara tinapua sohena i posi na ŋomimim ale i tiroma hin kamim ha malue na malele mata lotu Kŋisto na mapumim tari sei mo varaŋuhu. ⁴ Matan vara te tamlohi vujangi tinapua mo mai ale mo retivujavujangi na vujangi tinapua matea hin Iesu hin haratu kama lo vujangi kamim hinya moiso, teni hin te tanume tinapua hin Tanume Tapu atu ka lo lavia moiso, teni te Retiŋuhu tinapua hin haratu ka lo rasua, ale mo mera purongo vara kamim ka hitea mo ŋuhu purongo. ⁵ Matan na sopo ŋomŋomia vara enau na vejuveju hin la haratu Corinth sei la lo vereā vara la vahaŋule aulu jea, enira la jeuau. ⁶ Hina purongo vara na sopo levosahi na malele mata retireti sohera, pani enau a eŋi vereā vara na sopo vejuveju na lelevosahi. Varaŋuhu kamim ka levosahia vara kama lo vujangi na lelevosahi mo mera isamim moiso na malele tinatinapua matuvana.

⁷ Ka ŋom vara na vai te hehe hin haratu na hase tauau atano matan vara a tahe kamim na oloolo matan na lo retivujavujangi na Retiŋuhu non God isamim, ale na sopo usi te hinau hatea matana? ⁸ Korong ka ŋom vara na lo

vanaho na vao kalesia tinapua matan na avulahi mata a lavi na nora mania matan vara a eñi mai a lo volitusi purongo isamim. ⁹ Ale na rani na lo toho peresi kamim, na noku vejuveju na sopo usi te tuetueni isan te vonamim hatelete, matan la vorai kalesia atu sei la tai Macedonia, la lavi na tuetueni tinapua matea mo mañivisi vevuhi na noku vejuveju. Noku retihapahapa sei enia matan na hase taurilatiau vara a pa sopo tau te tetehi puhoni hatea isamim hin te malele, ale a pa sopo eñi vaia hin te rani. ¹⁰ Sohen retivarañuhu non Křisto mo lo toho hiniau, a pa sopo eñi isoiso na noku retihapahapa matan hiniau atu na jara tari matan Achaia. ¹¹ A pa reti hapahapa mata sava? Matan na sopo opoi kamim teni mo vono? God mo levosahia vara na opoia kamim.

¹² Ale sava na lo retihapahapa hinia, a pa lo retihapahapa hinia, matan vara a lanañihi na masapa tari mata retihapahapa isan la haratu sei la lo verea lara enira la sohemam na nomam vavahinau tari. ¹³ Matan, la tamlohi nike enira la vahañule haluhalu, la tamlohi haluhalu, ale la lo vaia sohena vara enira la vahañule non Křisto na nora halu. ¹⁴ Pani enau na sopo mañurahi hinira matan Setan i eñi hase vaia i mai sohena angelo mata malarani. ¹⁵ Matan haratu, mo sopo hiniau mañurahi matea vara volitusi non Setan la lo hase vaira sohen la volitusi tataholo non God, pani na isoisona, nora talai i pa tataholo i ñuhu na nora vavahinau.

Paul Mo Sopo Avulahi Hinira

¹⁶ A mele verea vara ha sopo řomřomia vara enau na rongorongono vono matan na lo retireti sohen harihi, pani hina purongo vara na lo vaia, ha lo tapurongo tako matan a pa mele retihapahapa makomona. ¹⁷ Řa levosahia vara Moli mo sopo avulahi na retihapahapa sohen harihi, pani na lo vaia sohena vara enau na tamlohi rongorongono vono matea. ¹⁸ Matan tamlohi tinatinapua la lo retihapahapa

usuri na vavahinau nona tamlohi, enau sohena a pa vaia. ¹⁹ Ka ñom vara nomim lelevosahi sei mo tavera jea, i pa tataholo vara ha tapurongo isana tamlohi rongorongo vono teni mo vono! ²⁰ Avei, nomim lelevosahi mo sohena sava matan mo sopo te hinau hinia vara te vonara mo vai kamim ka slev, teni vara ka levosahia vara mo lo haluhalu kamim mata nomim tavitav, teni vara la lo hani na masumasumim, teni vara la lo ñomaulu hinira hasera, teni vara la lo varasi na patumim. ²¹ Na hitea mo sati matan kamam kama sopo eñi vaia sohera!

Paul Mo Lo Retihapahapa

Pani vara tea mo ñomñilangi vara i retihapahapa na nona rongorongo vono, enau sohena a eñi vaia. ²² La tamlohi halu nike, la lo retihapahapa lara enira hasera la Hebrew, pani enau na Hebrew. Enira, la ñom vara enira hasera la tavitavuina Israel, pani enau sohera. Enira, la ñom vara enira hasera la mahapin Abraham, pani enau sohera. ²³ Na levosahia vara na lo retireti sohen na tamlohi rongorongo vono matea, pani na levosahia vara ka lo ñomñomia vara enira la lo volitusi non Kñisto, pani enau na jeura, noku vavahinau mo jeura, la tauriau na vano na ima ñilangi vaha visa, la rupi lejilejiau na asi maja vaha visa, mariviti vara a mate vaha visa. ²⁴ Vaha lima moiso, Jew la rupiau mo vaha ngavulu tolu mo limaravati (39).

Deut 25.1-3

²⁵ Vaha tolu, la hamajiau na vipahai. Na rani matea la paruaui vara a mate. Na pute na lanis vaha tolu. Na rani matea, na lo sale na pahai matea na tasi masapa mata rani matea ale pongi matea. ²⁶ Na hahau ñalihi mata jara la asau ñove vaha visa, ale na lavi na rani sasati na wai tavei, rani sasati mata tamlohi sei la lo vili na tamlohi mata mania, ale rani sasati isana Jew, rani sasati isana tamlohi ñoñoha, rani sasati na lolo taon tavera, rani sasati na rani na lo toho na jara hasetoho, rani sasati na tasi, rani sasati

isana vorai kalesia haluhalu. ²⁷ Na lo mauri peresi na noku malokoloko, noku rongohaji, ale na sopo eʻi juruvi vaha visa moiso mata marohati peresi na maʻohu, ale vaha visa moiso mo sopo te haku hinau. Vaha visa moiso na lo toho na jara hamariri sati pani mo sopo te noku ruru hamariri.

²⁸ Ale aulu hin la hinau sei, na rani hatehateahi, ʻromiku mo lo puhoni matan na sopo levosahia vara vao kalesia tari la lo toho sohena sava. ²⁹ Hare natu vara mo rongoa vara mo sopo te suihana, vara enau sohena na sopo rongoa, enjora. Hare natu vara i malue na malele rasua matan tea mo tikaulejia pani enau a pa sopo lolokoru matana, enjora.

³⁰ Vara a eʻi retihapahapa hin te hinau, a pa retiha-pahapa na hinau sei na sopo eʻi vaia haseku. ³¹ God, Taman Moli Iesu, enia i pa lavi na hasohaso mata rani tui tui. Enia mo levosahia vara enau na sopo halu, ³² ale hin rani atu na lo toho Damascus, tamlohi aulu na ruhuruhun Supe Aretas, mo sile na retileu matea isana tamlohi la lo kilau na matarua tavera matan taon tavera atu vara la pa taurilatiau, ³³ pani kalesia hai atu la tuhuau na windoa na sivo atano na tanga tavera matea na ropen taon atu, matan vara a eʻi malue a rovo!

12

Paul Mo Hite Na Tuka Na Mamavuhō Matea

¹ Na levosahia vara noku reti hapahapa nike mo rongorongo vono, pani a pa mele vere te makomona hin te hinau sei Moli mo vujangia isaku mo sohena mamavuhō matea. ² God mo sauau na sahe aulu na hatolu tuka na rani matea tauni mo sangavulu ʻromana mo vati la vano moiso, na sopo levosahia vara na lo toho na epeku teni mo vono, pani God mo levosahia. ³ Ale na levosahia vara enau vara na epeku teni mo vono na sopo levosahia pani God mo levosahia, ⁴ na sahe aulu na toho Paradise na

tuka, ale na rongo te hinau la tapu jea vara tea i eři mele verera isan tea na varama. ⁵ Matan la hinau atu natu God mo vujangira isaku a eři retihapahapa. A pa sopo eři retihapahapa hin na sava na vaia, pani hin haratu purongo sei na sopo eři vaia haseku. ⁶ Matan, vara a opoia vara a retihapahapa, a pa sopo tamlohi rongorongo vono matea matan na lo retivarařuhu. Pani a pa sopo vaia matan na sopo opoia vara tea i řomaulu hiniau i jeu na hinau mo eři hitea hiniau moiso teni na sava mo rongora isaku, ⁷ hina purongo vara God mo vujangiau na hinau řuhuřuhu jea. Matan haratu, God mo tinařihia vara a lavi na rani řilangi na lima angelo matea non Setan, ale mo vailejeleji na epeku matan vara a pa sopo retihapahapa hin la hinau sei God mo vujangiau hinira.

⁸ Na usi Moli vaha tolu vara i lanařihia isaku. ⁹ Pani mo vereia isaku mara, “Noku řomřuhu enia mo tataholo matam. Mata suihaku mo lo voko na hinau ko sopo eři hasem vaia.”

Ale matana, nake na avulahi purongo vara a reti hapahapa na hinau na sopo eři vaira haseku vara suihan Křisto i sopo lo toho hiniau. ¹⁰ Matan haratu, enau na avulahi vara na sopo eři vai te hinau haseku, ale matan haratu a eři lavi na retisasati nona tinapua peresi na rani řilangi, teni vara tamlohi la tipahiau, peresi na hina puhoni na lo lavia matan Křisto. Matan hin rani atu natu na sopo eři vai te hinau haseku, suihan Křisto mo lo tueniau.

Paul Mo Řomřomi Na Kalesia Corinth

¹¹ Kamim ka vaiau na vaia sohena tamlohi rongorongo vono matea, matan na lo retihapahapa sohen harihi. I pa tataholo vara ha vereia tataholo isara vara enau tamlohi matea tamlohi la eři rasua. Matan enau na sopo vejuveju hin te hinau hatelete sohen la ‘vahařule aulu jea’ sevano, hina purongo vara enau hina purongo matea. ¹² Varařuhu na vai na matamata tataholo nona vahařule varařuhu.

Na noku řomperavu na vai na matamata tavera peresi na hinau mařurahi peresi na vavahinau mata suiha na nahomim. ¹³ Ale, hinau matea purongo sei na sopo vaia na lo vaia isana vao kalesia tinapua, enia vara na sopo usi te tuetueni isamim. Ha řomiau matan na sopo usia!

¹⁴ Ka hitea, na tatamahu moiso vara a mele rohi kamim na hatolu noku hahau. Ale na sopo opoia vara a mai tetehi puhoni matea isamim. Na sopo opoia vara a lavi te nomim hinau, na opoi kamim purongo! Matan natuvarihi varihi la sopo sile na mania isana tamara peresi na tinara mata hara hinau, pani tamara peresi na tinara la vaia mata natura. ¹⁵ Ale a pa avulahi jea vara a hase jalahi na mauriku peresi na noku hinau tari mata maurimim. Ka řom vara mo tataholo vara hina purongo vara noku opoia mo tavera matamim, kamim ha pa opoiau makomona purongo?

¹⁶ Vara mo sohen haratu, na sopo lo tau te tetehi puhoni isamim. Pani hai la pa lo vere a vara enau na mai luhu isamim vara a tikauleji kamim na noku haluhalu. ¹⁷ Pani vara mo sohena, a pa halu kamim sohena sava? Mo toma, na vaia hin te vonan la tamlohi atu sei na lo řulera la vano isamim? ¹⁸ Na rani na usi Titus vara i rohi kamim ale na mele řule na vorai tinapua matea vara i usuria, korong Titus mo haluhalu kamim? Mo vono! Matan kamam rua kama hahau na posposi matelete purongo. Korong ka hitea vara kamam rua kama sopo vaia sohena teni mo vono?

¹⁹ Korong ka lo řomřomia vara tarea kama lo vere la hinau nike enira, matan vara kama hase vere a vara kama tataholo mata vaira, pani mo vono. Kamam volitusi non Křisto, ale kama lo vere la hinau nike isamim na nahon God, ale na hinau tari kama lo vaira, enira matan vara la tueni kamim ha ulua. ²⁰ Matan na levosahia vara a mai isamim, a pa sopo avulahi na sava a pa hitea isamim, ale

ha pa sopo opoi na sava a pa vereā matana. Na levosahia vara a pa vileia vara kamim ka lo vasvas, ka lo mereimerei, ka lo lolokoru patumim, ka lo hanmarua, ka lo verelejeji na tinapua, ka lo sorasora tamlohi, ka lo mangisi ale mo sopo te oloolo isamim. ²¹ Enjora, na levosahia vara a mai isamim God i pa vaiāu a mahanuhanu mata nomim posposi natuvarihī, ale řomiku i pa sati matan matuvana isamim sei la hehe tiroma moiso, la sopo lo vahaři na nora posposi lumīha, teni na nora posposi maji peresi na nora marohati mata posposi sohen haratu.

13

Isoiso Retituetueni Non Paul

¹ Harihi enia noku hatolu mai vara a rohi kamim. Ale sohena Retitapu mo vereā vara, ‘Ha pa turu na retireti non te tupra rua teni te tupu tolu matan te hinau tea mo vaia mo sati’.

Deut 19.15

² Na pete retiřoařoahai la haratu la lo hehe na harua noku rohi sei moiso. Ale nakerihī, na lo mele retiřoařoahaira peresi na tamlohi tari, sohen na pete vaia tiroma moiso, vara hin harakerihī, a pa sopo řom tea vara i sopo lavi na talai mata nona hehe, ³ matan ka lo opoia vara ha levosahia vara varařuhu, Křisto mo lo retireti hiniau. Křisto mo sopo kilau purongoi na sava ka lo vaira, pani hin kamam, enia suiha tavera jea matea na livuhamim. ⁴ Hina purongo vara mo mate na talopeilopei sohena mo sopo te suihana, pani nake mo lo mauri mata suihan God. Ale, kamam sohena mo sopo te suihamam, pani kama pa toho peresi kamim na suihan God. Suiha atu sei kama lo vavahinau hinia matamim.

⁵ Ha hase vaihite kamim hasemim vara varařuhu nomim rasua mo varařuhu. Ha hase kilau usuri kamim hasemim! Vara ha sopo eři hitevosahia vara Iesu Křisto mo lo mauri hin kamim, mo řaramia vara ka jovi na

nomim vaihite. ⁶ Ale na lo řomtau vara kamim ka hitevosahia vara kamam kama jeu vaihite nike moiso.

⁷ Ale kama lo usiusi isan God vara ha pa sopo vai te hinau sasati. Mo sopo matan vara tamlohi la pa hitea vara kama jeu vaihite atu moiso, pani matan vara ha pa vai na hinau tataholo, hina purongo vara ka lo řomřomia vara kama sopo lo jeu vaihite atu. ⁸ Matan kama sopo eři vai te hinau vara i turuleji na retivarařuhu, pani kama pa lo turu řilangi mata retivarařuhu tarea. ⁹ Matan enia hina purongo vara mo sopo mele te suihamam, pani kama pa avulahi vara kamim ka řilangi varařuhu. Nomam usiusi enia vara ha jea i řuhu na mauri rasua.

¹⁰ Matan haratu, na lo uli la hinau nike Macedonia isamim vara ha lo vai tatalohoi na maurimim, matan vara na rani vara a pala, a pa sopo vai na posposi řilangi hajavua na noku suiha sei Moli mo sileau hinia mata vai na kalesia la ulua, pani mo sopo mata vilijovjovira.

Isoiso Retireti

¹¹ Ale isoiso hinau la vorai peresi na vevorai, enia vara ha avulahi, ha mele vai mamahuni na maurimim la tataholo, ha řomřilangi, ha turu jara matea na řomimim hatehateahi, ha toho na tamata, ale God mata opoia peresi na tamata i pa toho peresi kamim.

¹² Ha tapatapai kamim na posposi mo tataholo mata kalesia. Tapuhi tari nike la sile na nora retioloolo isamim.

¹³ Řomřuhu non Moli Iesu Křisto peresi na opoia non God peresi na tapala řuhu nona Tanume Tapu i pa toho peresi kamim mo isoiso. Amen.

Tangoa New Testament
The New Testament in the Tangoa Language of Vanuatu
Le Nouveau Testament dans la langue Tangoa de Vanuatu

copyright © 2010 Wycliffe Bible Translators, Inc.

Language: Tangoa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

PDF generated using Haiola and XeLaTeX on 11 Sep 2021 from source files dated 10 Sep 2021

89356e5c-df58-558e-9b27-ae0321adb2df